

Proximo streetcar ta na caminda pa reenforza fluho di turista pa centro di ciudad

ORANJESTAD – Actualmente ta na caminda e di tres streetcar. E vehiculo ta bin como un stap mas den culminacion di e proyecto di Renobacion di Oranjestad y ya por tuma nota di e falta cu e ta haci. Ultimo cifranan recauda ta muestra cu te cu februari 2015, e dos streetcar existente a transporta un total di mas cu 357 mil persona pa y for di centro di ciudad.

Despues cu na 2013 y 2014 a yega prome dos streetcar, esta e berde y e blauw di dos piso, rapidamente centro di ciudad a ahusta na e dinamica di su pasada den Caya G.F. Betico Croes, Havenstraat y Schelpstraat. E streetcar, cual su color



ta oraño, ta bin pa ocupa luga di e berde, cu originalmente a wordo crea como “reserve”, mientras cu un di e otro nan ta ricibi mantencion. Motibo cu e reemplazo a yega prome cu esunnan regular, ta pa motibo cu e diseño y prijs di e otro nan no tabata cumpli cu exigencianan di Gobierno. E streetcar oraño, mescos cu otro nan prome, a wordo

fabrica na e compania TIG/m Modern Street Railways ubicada na California.

Diferente den e streetcar oraño ta cu su sistema di bateria ta ainda mas avansa tecnologicamente, cu esunnan prome. Esaki ta nifica cu e streetcar nobo ta mas eficiente den su uzo di energia for di baterianan di tecnologia “hydrogen”. □